

Dumengia, ils 17-02 ha il Club da skis Sedrun, organisau ensemen cun la vischnaunca Tujetsch ina pintga fiasta ella sala Cristalla cun il motiv da gratular a Cla Ursin sin sia grondiusa prestaziun tier ils giugs olimpics Europeics a Sarajevo.

Sper las numeruras gratulaziuns ha el era raquintau sur dil schabegiau.



Cheu entgins detagls da quei interessant eveniment nua che 58 atlets svizzers han priu part en interessantas disciplinas sco cuorsa liunga, skis alpin, snowboard, patinadi artistic e spertadad, curling, hockey, biatlon.

**Gerau Mario Hitz gratulescha en num dalla vischnaunca Tujetsch a Cla Ursin per sia excellenta prestaziun all'olimpiada da giuvenils a Sarajevo.**



Las emeziuns ein stadas fetg grondas, cura che Cla Ursin ha encurschiu, ch'el seigi in dils currides ch'astgi presentar la Svizra tier quell'occurrenza da prestige.

L'entschatta era quei buca aschi real. Pli concret seigi quei lu daventau cura ch'el hagi saviu ir per tut il resti che representava la Svizra e sil pli tard cura che tut ils Svizzers seigien marschai en ina colonna en in grond stadion cun 30'000 aspectaturs. Pér lu seigi el staus segirs, ch'el seigi in da quels che hagi il cletg d'esser ina part da quels giugs.

Astgar far part ei gia ina grondiusa caussa, denton vid medaglias ughegiavi el gnanc da patertgar.

El ha gia mussau grondiusas prestaziuns sil level svizzer denton internaziunal era ei grev da schazegiar en, con buns ch'el seigi.

Als giugs olimpics ha il Cla Ursin priu part a quater occurrenzas: Sprint, cuorsa en gruppa, cuorsa classica e cuorsa el stil liber.

- Il sprint seigi buca sia fermezia, el drovi in tec memia ditg da vegnir sin turas.
- Ella cuorsa classica, nua che l'aura era fetg speciala e midava daferronttier era ei grev da gartegiar il ski cun si la drete tschera. Ils

emprens curriders hagian giu il cletg. Ei pluevi ed aschia revegi ei duront entira cuorsa pli u meins adina las medemas relaziuns da neiv, senza midadas pli grondas. Cura ch'el seigi partius hagi la temperatura entschiet a sesbassar aschia ch'ei hagi entschiet a neiver. Cunquei ch'els havevien unschiu per neiv bletscha taccavi la neiv nova mordio. Pia buca pli pusseivel da far in bien plaz.

- En gruppa, duas damas e dus umens (4x5 km) ein els daventai tiarzs. Quei ei stau ina speciala occurrenza. En norma ein las cuorsas da cuorsa liunga adina ina caussa per ina persuna singula. Cheu hagi ins inagada saviu selegrar en gruppa – zatgei tut special.
- La pli custeivla medaglia ei segir il tierz plaz tier la cuorsa el stil liber, ina cuorsa singula sur 7.5 km. Cura ch'el seigi vegnius ell'arrivada eri el gia sil tierz plaz, e quei cun mo 13 secundas retard sigl emprem. Il mender seigi stau, ch'ils curriders, che vegnevien numnai sco favorits, partevien suenter el. Aschia hagi el stuiu spitgar e tremblar bien a ditg tochen ch'el seigi staus segirs, ch'el gudogni la medaglia da bronz.

Preziau Cla Ursin, nus gratulein aunc inagada e giavischein vinavon bien engaschi e buna sanadad en tiu bi sport preferiu.